

太上玄靈北斗延生經

古籍保





太上玄靈北斗本命延生經



爾時太清天中大聖老君以永壽元年正月
七日在太清境上太清宮中觀見衆生億劫
漂沉周迴生死或居人道生在中華或生夷
狄之中或生蠻戎之內或富或貴或賤或貧
暫假因緣墮於地獄轉乖人道難復人身還
歸輪轉為無定故罪業牽纏魂繫陰司受苦
滿足人道將違生居畜獸之中或生禽虫之
屬轉乖人道難復人身如此沉淪不自知覺
為先世迷真之故受此輪迴我以哀憫之心

分身教化。化身下降。至於蜀都。地神湧出。扶一玉局而作高座。於是

太上昇玉局坐。授與天師真人北斗本命經訣。廣宣要法。作人舟船津梁。男女普濟衆生。使不失人路。

太上是時告天師曰。人身難得。中土難生。假使得生。正法難遇。多迷真道。多入邪宗。多縱罪根。多諸巧詐。多恣淫殺。多好群情。多愛貪瞋。多沉地獄。多失人身。如此等緣。衆生不悟。不知正道。迷惑者多。我今哀見此等衆生。故

垂法教。為說良緣。令使知道。知身性命。皆憑
道生。了悟此因。長生人道。種子不絕。世世為
人。不生無道之鄉。不斷人之根本。更能心修
正道。漸入仙宗。永離輪迴。超昇成道。我故示
汝妙法。令度天民。皈真知命。可以本命之日。

修齋設醮啓祝

北斗三官五帝。九府四司。薦福消災。奏章懃
顙。虔誠獻禮。種種香華。時新五果。像世威儀。
清淨堂宇。法天像地。吾科善教。請正一道士
一人。或一或二或三或五或七。或於觀宇。或

在家庭。隨力建功。請行法事。於是功德深重。
不可具陳。念此

太上北斗真君名號。當得罪業消除。災衰洗
蕩。福壽資命。善果臻身。

北斗真君應驗曰

家有北斗經

本命降真靈

家有北斗經

宅舍得安寧

家有北斗經

父母保長生

家有北斗經

諸厭化為塵

家有北斗經

萬邪自端正

家有北斗經

營業得稱情

家有北斗經

闔門自康健

家有北斗經

子孫保榮盛

家有北斗經

五路自通達

家有北斗經

眾惡永消滅

家有北斗經

六畜保興生

家有北斗經

疾病得痊瘥

家有北斗經

財物不虛耗

家有北斗經

橫事永不起

家有北斗經

長保亨利貞

道言。北辰在象。而衆星拱之。為造化之樞機。作人神之主宰。宣威科戒。統御萬靈。判人間善惡之期。勾陰府是非之目。五行共稟。七政同科。有回死注生之功。有消災度厄之力。上至帝王。下及庶人。尊卑雖別。殊塗命分俱無差別。凡夫在世。迷謬者多。不知身屬北斗。命由天府。有災有患。不知解謝之門。延福延生。莫曉皈真之路。致使魂神被繫。禍患來纏。或重病不痊。或邪妖剋害。連年困薦。累歲屯遭。塚訟徵呼。先亡復連。或上天譴責。或下鬼所

誣。若有此危厄。如何救解。急須投告
北斗。醮謝真君。及轉真經。認本命真君。方獲
安泰。以至康榮。更有深妙。不可盡述。

北斗真形頂禮恭敬。呪曰。

天靈節榮

顏保長生

太玄之一

守其真形

五藏神君

各保安寧

第一北斗貪狼太星君子生人屬之

第二北斗巨門元星君丑亥生人屬之

第三北斗祿存真星君寅戌生人屬之

第四北斗文曲紐星君卯酉生人屬之

第五北斗廉貞岡星君辰申生人屬之

第六北斗武曲紀星君巳未生人屬之

第七北斗破軍關星君午生人屬之

北斗左輔星君

北斗右弼星君

三台生我来

三台養我来

三台護我来

於是真形名號。不可得聞。凡有見聞。能持念者。皆道心深重。宿有善緣。得聞持誦。其功德力。莫可稱量。濟度存亡。增延福壽。巍巍功德。真聖祖宗。為性相之根本。若正信男女。值此真經。智慧性圓。道心開發。出群迷徑。入希夷。

門。皈奉真宗。達生榮界。於三元八節。本命生辰。北斗下日。嚴置壇場。轉經齋醮。依儀行道。其福無邊。世世生生。不違真聖。不入邪見。道言。凡人性命五體。悉屬本命星官之所主掌。本命神將。本宿星官。常垂蔭佑。主持人命。使保天年。凡俗無知。自身不悟。夫本命真聖。每歲六度降在人間。降日為本限期。可以消灾懺罪。請福延生。持此真經。隨力章醮。福德增崇。其有本命限期將至。身自不知。不設醮筵。不修香火。此為輕生迷本。不愧人身。天司

奪祿減筭除年。致多天喪。如此之人。身謝之
後。淪沒三塗。漂諸六趣。生禽獸中。永失人身。
為本命人根本。明所報也。若本命之日。其有
男女。能修齋醮。善達天司。一世於本命限期。
開轉此經。廣陳供養。使三生長為男子身。富
貴聰明。人中殊勝。其有男女生身果薄。雖在
人中。貧窮下賤。縱知本命。無力修崇。可以酌
水獻花。冥心望北極。稽首禮拜。念本命真君
名號者。亦不虛過本命期限。皆得延生注福。
繫係人身。灾厄蠲除。獲福無量。天師歡喜踊

躍。作禮圍繞讚歎。難可得遇無上法橋。

道言。於是重告天師曰。世人罪福善惡。皆達天司。懺罪消災。莫越修奉。建齋設醮。種人世善根。遇本命生辰。告身中元辰驛馬。削落三灾九厄。保見今眷屬安寧。悔過虔恭。漸登妙

果。重立玄功。證虛無道。證虛無道。乃得聖智。圓通聖智。圓通隱顯。莫測出有入無。逍遙雲際。昇入金門。與聖合真。身超三界。永不輪轉。壽量無窮。快樂自在。於是天師授得妙法。而作是言。誓願流行。令傳善士。若有男女授持。

讀誦。我當與十戒仙官。所在擁護。迷誤之者。
值遇經訣。懷不信心。毀謗真文。如此之人。罪
根難滅。命沉六趣。永失人身。深可悲哀。自致
斯苦。凡有上士。於本命生辰。持讀是經。皆外
伏魔精。將安真性。功霑水陸。善及存亡。保而
敬之。非人勿示。永為身寶。福壽可稱。是經在
處。有南陵使者三千人。北斗真君七千神將。
本命靈官降駕。衆真悉來擁護。持經之人。常
持誦七元真君所屬尊號。善功圓滿。以降吉
祥。即說北斗呪曰。

北斗七真

天中大神

上朝金闕

下覆崑崙

調理綱紀

統制乾坤

貪狼巨門

祿存文曲

廉貞武曲

破軍輔星

大周天界

細入微塵

何灾不滅

何福不臻

玄黃正炁

來合我身

天罡所指

晝夜長輪

隔居小人

好道求靈

常見尊儀

願賜長生

高上玉皇

紫微帝君

三台生我來

三台養我來

三台護我來

道言。凡有男女。於本命生辰及諸齋日。清靜

身心焚香持此真文。自認北極本命所屬星君。随心禱祝。善無不應。災罪消除。志感萬聖。千真俱來衛護。此經尊重。是修真之通路。得道逍遙。皆因此經。證聖成真。皆因此經。出離生死。皆因此經。保護男女。皆因此經。保命延年。皆得自在。此經若所在之處。千真敬禮。萬聖護持。魔鬼潛消。精靈伏匿。世有災殃。悉皆消滅。凡有急難。可以焚香誦經。剋期安泰。於是乃稱念。

大聖北極救苦呪曰

大聖北斗七元君

能解三灾厄

大聖北斗七元君

能解四殺厄

大聖北斗七元君

能解五行厄

大聖北斗七元君

能解六害厄

大聖北斗七元君

能解七傷厄

大聖北斗七元君

能解八難厄

大聖北斗七元君

能解九星厄

大聖北斗七元君

能解夫妻厄

大聖北斗七元君

能解男女厄

大聖北斗七元君

能解產生厄

大聖北斗七元君

能解伏連厄

大聖北斗七元君

能解疫癘厄

大聖北斗七元君

能解疾病厄

大聖北斗七元君

能解精邪厄

大聖北斗七元君

能解市狼厄

大聖北斗七元君

能解虫蛇厄

大聖北斗七元君

能解劫賊厄

大聖北斗七元君

能解枷棒厄

大聖北斗七元君

能解橫死厄

大聖北斗七元君

能解呪誓厄

大聖北斗七元君

能解天羅厄

大聖北斗七元君

能解地網厄

於是七元君。大聖善通靈。濟度諸厄難。超出
苦衆生。若有急告者。持誦保安寧。盡憑生百
福。咸契於五星。三魂得安健。邪魅永能停。五
方降真炁。萬福自來并。長生超八難。皆由奉
此經。生生身自在。世世保心清。善似光中影。
應如谷裏聲。三元神共護。萬聖眼同明。無灾
亦無障。永保道心寧。

道言。說經將畢。龍鶴天仙來迎。

老君還於玉京。是時老君重告天師曰。可以
宣揚正教。普濟世人。福利無邊。永霑勝善。是
時天師再拜老君。流傳此經於世。廣垂濟度。
勿示非人。戒慎之焉。
太上玄靈北斗本命延生經



奉

道信官郭汝公幹寓荊州正統十年二月內二次皇

穹告許印施

太上玄靈北斗本命延生真經共六千卷析保自

身平安官祿如前更保親男四位長太成人

自陳願後果應良緣今捐資財命工印造

賽還更求後福者

正統十二年二月

日施



